

Tutu e táxnūu Santiau iña ñá Israee

Taxnūu Santiau ntiúsi

¹ Xu'u é Santiaú u ne, kade tsiñu ú iña Xuva ko ni Tó'o ko Jesūcristu. Taxnūu u tú'ūn sa'á iña nto, ðivi ntō e kúvi uxuvi táta ña Israee nto, da mí'i ká mi ntántoo nto. Ntiusi nto.

Kata'xi Xuva kō e dóo ki'in inī ko nté koo vii o

² Kuntoo díni nto, tá'an ko, da ntánto'o nto é tūku e túku nuu i. ³ Ini nto tsí da ntánto'o nto kuenta iña i e ntákuinti'xe nto ne, ntáku'ú've nto é kutíi nto ði. ⁴ Na kūtíi ká nto vata koo é kutu've vá'a nto, vata koo é ntūvá'a ña'a nto ne, ñá tē nee iñá kunáa nteē ntó nuu Xuva ko.

⁵ Tē ñá ini nto nee é vā'a é vii ntó ne, kákan nto nta'a Xuva kō. Tsí kantétu ña é kuē'é ña é kūtuni un ntíi ntíi ña'a nee iña é vā'a. Ná kāde víni ña, ntē ña kada tíi ña ni ntō. ⁶ Ntá tsi te kákan ntó nta'a ña ne, kaníi nima ntó kuinti'xe nto é nantiko koō ña. Ntē ña ku dé kuení nto te ña nantiko koó ña. Tsí ña ntádē kuení i sán ne, kuān ntāa ña vata kaa ntute ñu'u san é kaido ne, kanainu dá kainu tatsín san. ⁷ Tē ña te káníi nima nto ntákuinti'xe nto da ntaíkan nto nta'a Xuva kō ne, ¿mí'i ntu tā'xi ña é ntaíkan nto? ⁸ Tsí uun ña'a, ña é uvi nuu i kade kuení i ne, nuu nuu tsi kanadama ña é vii ña. Tuku vií ña vevíi ne, é tūku vií ña uten.

⁹ Ta'an ko, ña e dóo ntā'ví san ne, kuān té ña nuu á'vi ña ñuxiví sa ne, ntá tsi na kutūvi díni ña, tsi dóo nuu á'vi ña nuu Xuva ko. ¹⁰ Ta'an ko, ña e dóo kuikā sán ne, na kutūvi díni ñá te xūvi kaika ña. Tsí vata kaa laa é kae'nu má kū'u kan kaa ña. Tsí uun da'na tsi vé'xi ñuxiví sa. ¹¹ Laa sán ði ne, uun dá'na tsi kakene ne, kanakó'xo dá kāxi'i díi xuku i ka'ni ngántíi san. Ná vā'á ka kídaā. Kuan kōo kuvi ni ña kuiká san ði. Tsí uun da'na tsi ntí'i nuu mii ña nī é iō iña ña.

E ntánto'o kō

¹² Nté kui vá'a ña'a, ña é kakutíi i é kanto'o i. Tsí te kutíi ña ne, ní'i ña ntuvi vá'a iña ñá nta'a Xuva kō. Tsí Xuva kō ne, e xé'e ñā xu'u ña tsí kuntoo ña ni ñā, xoo é kākūinima í ña. ¹³ Te iō uun nuu í é kīni kaa é ncho víi o ne, ñá ku kadā kuení ko te nta'a Xuva ko vē'xi, tsí ña túvi mí'i kene ña é víi ña é kīni kaa né, ntē ña katá'xi ña é víi o é kīni kaa di. ¹⁴ Tsí nima kīni kaa ko kaikan e dóo ncho víi o é kīni kaa san. ¹⁵ Te kuinti'xe kō é kaikan nima kó san ne, víi nti'xe o é kīni kaa san. Kidāā né, tē kuíni kō é víi o é kīni kaa san ne, ní'i kō doxi'í san.

¹⁶ Ntō'o tá'an ko e dóo ntio ko, ñá ku kanī nta'ví mii ntō nima nto. ¹⁷ É un nti'í nuū i e dóo va'a, nuu i é nuu é ntaā í ne, ñá tsí é vē'xi e dukún kán. Xuva ko kataxnūu ña é vā'á mii kō. Tsí ñá ñā ede kú'vē ña ñu'u é kāxi'í nuu e dukún kán. Ní'ū sán ne, kanadama, ntá tsi Xuva kō ne, ña kanadama ña nté un siin. ¹⁸ Tsí mii ñā ntío ña é nakáku ña kō da kuínti'xe ko tū'un é nuu é ntaā i iña ña é ntio ña é kivi o vata ntāa i'xa nuu i iña ña.

Xoo é ntio nti'xe i Xuva kō

¹⁹ Kutuni nto sá'a, ta'an ko, ña e dóo ntio kó ne, ntíto víi nto, un ntíí ntíi nto, dá ntaíni nto ne, ñá ku dotō tsí ka'an nto. Nǎ te ūra tsí kudiín nto di. ²⁰ Tsí te kūdiin ó ne, ñá ntáde o é vā'a é ntio Xuva kō. ²¹ Dukuān né, xtúví xio nto da nēé ka nuu i é kīni kaa san. Mii tsí é kuinti'xe nto tú'un e xnúu Xuva kō nima nto. Divi tsí é kaidiá'vi é nakáku o.

²² Ntá tsi ña te da mii tsí é kīni nto é kākā'an tú'un Xuva kō, tsí kada ntaa nto. Te da mii tsí e ntaíni nto ne, ntaéni nta'ví mii ntō kúñu ntō. ²³ Xoó ña'a é da mii tsí e kaíni ña tú'un Xuva kō ne, ntá tsi ña káde ntaa ña vatā ó kaka'án ne, vata tsi kaa ña é kaito nuu speju kaa ña. ²⁴ Tsí kainí ña nuu ña, ntá tsi dá kaxkokoō ñá ne, ura tsí i kakunaá ini ña nté ito ña. ²⁵ Ntá tsi utén utén nakuā'a nto tú'un e dóo va'á san iña Xuva ko, tú'un é nakáku kō é kīni kaa san. Xoó ña'a é ña kunáa ini ña tú'un é nakuā'a ña, tsí kade ntaa ña é kākā'án ne, naxnuu viko Xuva ko ña.

²⁶ Xoó ña'a é kākā'an ña tsí kantikin ñá Xuva kō, ntá tsi ña káde ña kuenta é kākā'an ñá ne, ¿mí'i ntū nuu é ntaā i é kakuinti'xe ña Xuva kō? Da mii é kaeni ntā'ví mii ñá kúñu

ñā. ²⁷ Te nūu é ntaā í ntákuinti'xe ko Xuva kō né, vii o é vā'á, vii o é ntio ña di. Xntii o á i'xa kií san ne, xntii o ña dī'i ntā'ví san di nēe e ntátaan núu ña. Nā vii o é kīni kaá vatā ó de ña'a, ña é ña ntákuinti'xe i Xuva kō.

2

Dadii tsi vii o nī dá xōó ka ña'a

¹ Ntō'o, tá'an ko e ntákuinti'xe nto Tó'o ko Jesūcristu, ña e dóo va'á kue'én ne, ñá ku nāntii ni'ni nto nté uun ña'a san. ² ¿Nté koo vii nto te xēe úun ña'a mí'i ntánataká nuu nto, ña é nuu nta'a i di'i e kúvi oró ne, ni dōo é ña te nté kaa va'á ne, dadii tsi xee úun ña ntā'ví, ña é nuu doo tsude? ³ Te kinī ntó ña é nuu doo vá'a sán ne, tē ka'an ntó ni ña ni ñā: “Kutuvī ntó i'a mí va'a ó sa”, ne, te ká'an ntó ni ña ntā'ví san: “Ikan kuntitsin, o kutūvín ñu'u san”; ⁴ te kuān koo ka'an ntó ne, ntádē kú'vē nto tsí ió ña'a sán ne, dií ka nuu á'vi ña é ña nguii san. Nā vā'á o é kuān koo kada kuení nto.

⁵ Kini nto, ta'an ko e dóo ntio ko, tsi é nakaxnúu Xuva ko ña ntā'ví san é dií ka kuinti'xe ña, é ni'i ña é vā'a iña Xuva ko. Tsí kuan o ka'an Xúva kō é kuē'é ña iña ña, da xōó ka ña'a, ña é mēni í ña. ⁶ Ntá tsi divi ntō ne, ntáde xení nto ni ña ntā'ví san. Ntá tsi ¿ñā ntu te ña kuiká san e ntáde xení ña ni ntō? ¿Ñā ntu te divi ña e ntáñu'u ña nto, ntáñe'e ni'i ña nto nta'a ña tsíñu i san? ⁷ ¿Ñā ntu te divi ña e ntáka'an kīni ña iña Cristu, ña e nteé kimi nto?

⁸ Ntō'ó ne, vá'á ó de nto tē ntáde ntaa ntí'xe nto lei é odo nūu mí kākā'an tú'un Xuva kō é na kuīnima kó ta'an ko vatā o ntákuinima ko kúñu kō. ⁹ Ntá tsi tē dií ka va'a ntáde nto ni ūun ña'a é tuku ña'a sán ne, iō kuetsí nto, tsi ña ntáde ntaa nto é kākā'an lei Xúva kō. ¹⁰ Tsí te ūun ña'a kade ntaa ntí'i ña leí san ne, ntá tsi te ūun tsi nuu i é kakó'xo nteē ñá ne, vata tsi te kākó'xo nteē ña é un ntí'i é kākā'an leí san. ¹¹ Tsí mii tsi Xuva kō xtúvi ña é ña kúvi kiní dikí o ñadī'i ñá'a ne, divi ñā xtúvi ña é ña ka'ní o ña'a. Tē ña kañi dikí nto ñadī'i ña'a sán ne, ntá tsi kae'ní nto ña'a ne, kidáa ne, kakó'xo nteē nto é kākā'an leí san.

¹² Dukuān ne, vá'ā koo ka'an ntó ne, vá'ā koo vií nto di vata kaa ña'a, ña é kī'in ntá'a ña kaxntēkú kū've kuenta iñá leí san é nakáku o. ¹³ Tē ña ni ntunta'ví ini ko ña'a vevii ne, ñá ntuntā'ví ini Xuva ko kō te xee o nta'a ña é xntēkú kū've iñá ko kídaa. Ntá tsi tē ntúnta'ví ini ko ña'a san vevii ne, ní'i kō é vā'á nta'a Xuva kō kídaa.

Ñá te da mii tū'un ka'an o

¹⁴ Ntō'ó ta'an ko, ¿neé ntu kaidiá'vi i te uun o kāka'an o é kakuinti'xe ko Xuva kō, ntá tsi ña káde o é vā'a? ¿Kūvi ntu nakáku o é kuān ó kaka'an o? ¹⁵ Te ūun ta'an ko kataan núu ña é ña tuvi dóo kunúu ña, é ña tuvi é kā'xi ñá ne, ¹⁶ te iō ntó ka'an ntó ni ñā: “Va'a vá'a tsi koo kue'ēn nto. Xuva ko na tā'xi ña doo é kunūu kutavi nto. Na tā'xi ña é kō'o é kā'xi ntó di.” Te kuan kōo ka'an ntó ne, ntá tsi ña kaxé'e nto é kataan núu ña é kunūu ña, nte é kā'xi ñá ne, ¿neé ntu kaidiá'vi i? ¹⁷ Te xo'ō ntáka'an o tsi ntákuinti'xe kō ne, ntá tsi ña ntáde o é vā'á ne, ¿mí'i ntu kaidiá'vi i e ntákuinti'xe kō?

¹⁸ Ntá tsi te iō ñá'a é ká'an ña: “Dívi ntō né, kakuinti'xe nto Xuva kō. Xu'ú ne, kade ú nuu i é vā'a. ¿Nté ntu koo nañē'e ntó ko tsí kakuinti'xe nto tē ña káde nto é vā'a? Tē kade u é vā'á ne, kutuni nto tsí kakuinti'xe ko é nuu é ntaā i”, koo ka'an ña. ¹⁹ Kakuinti'xe ntō tsí uun tsi Xuva kō. Vá'á ó ni. Ntá tsi kuān o ntákuinti'xe é ña vá'á sán di ne, ntaní'i, tsi ntaú'ví i. ²⁰ ¿Nté kuān nte túntu ntú nto? ¿Na nū'u ntó iní nto tsí ña kaidiá'vi i te da mii tsí é ntákuinti'xe kō ne, ntá tsi ña ntáde o é vā'a? ²¹ Uva ata ika ko Ābraán ne, ¿ñā ntu te kaká'an Xúva kō tsi dóo va'á ña é xntéku ña nú nāa kan i'xá ña, Isaa, vata kaa uun doméni iñá Xuva ko? ²² Íni nto vē tsí nuu é ntaā i e kuínti'xe Ābraán san, tsi dé ntaa ña e kuínti'xe ña. Kutuni ko tsí da ide ña é vā'á ne, díí díí ka kuínti'xe ña di. ²³ Kuan o kúntaa vatā ó kaka'an tú'un Xuva kō: “Ābraán ne, kuínti'xe ña Xuva kō ne, ka'an Xúva kō tsi dóo va'á ña”, ka'an. Kaka'an Xúva kō tsí Ābraán san ne, kuvi ña ña vá'a tiin ní'i ñā.

²⁴ Íni ntó ve, tsí kaka'an Xúva kō tsi va'á ña'a, ña é ña te da míi tsí é kāka'an ña tsí kakuinti'xe ña, tsí kade ña é

vā'á di. ²⁵ Kuan ō dé Raá san, ñadĩ'i, ña e íka luku kídaā. Kaka'an Xúva kō tsi va'á ña'a ña, tsi dóo vá'ā o dé ña da tsú'un xu'u ña mau iña ñá Israeé san ne, xio itsi táxnūu ña ña da nchó ka'ní ña'a sán ña. ²⁶ Tē ña kantíto nima kó ne, ñá vādá mi kaidiá'vi kúñu kō di. Dadii tsi, tē ña káde o é vā'á san ne, ñá vādá mi kaidiá'vi i e kuínti'xe kō.

3

Xaa kō

¹ Ntō'ó ta'an mii ko, ñá tē nté sa titín nto é vii ntó mastru iña tú'un Xuva kō, tsí ini o tsí dií ka tá'xi Xuva kō é nto'o ko, xo'ō é mastru ó, tē ña ntáde ntaa o. ² Un ntĩ'i ō ntáko'xo ntee ō. Te iō ña é ña kakó'xo ntee ña é ká'an ñá ne, vá'ā kue'en ña. Ntē ña kakó'xo ntee ña é kini kaa sán, ³ vatā ó de ō dá kaxnuu ō káa xu'u idú san vata koo é vii ti é ntio kō ne, ña kúvi kī'in ti mí ntio ti. ⁴ Koto nto tun ntōó san di. Ñá te nté kaa na'nu. Un vá'a tsi ntii ntaíka dá kainu tatsín san. Ntá tsi ña kanakāka sán ne, vava kaa kudii á utun é ntee étí i kan kanakāka nuu ña vata koo é kī'in da mí'i ká mí ntio ña. ⁵ Kuān ó kuvi ni xaa kō di. Kuān té divi á ta'vi i é dií ka lú'nti é kaniñ kúñu kō ne, ntá tsi dóo ka'nu ncho vii. Kuān té un siin kudii ngíñū'ú ne, ñá tē nté kaa kue'e koko ní'ni. ⁶ Xaa kō sán ne, vata kaa ñu'ú san kaa. Ña túvī neé ka ta'vī kúñu kō e dóo kini ide. Tsí divi kade i é kativí kaniñ kúñu kō. Kade i é tiví ko ni ta'an kō di. Kaka'an xaa kō é kini kaa é vē'xi dô'vi kan. ⁷ Da nēé ka kití ne, da nēé ka láa, da nēé ka kóo, da nēé ka kití ntute ne, kuvi kutó'o tí ne, kuān o ntádē tó'ō ñá ti. ⁸ Ntá tsi xaa kō sán ne, xoxó kuvi kada tó'o i. Ñá kākukadin xaa kō é kaka'an é kini kaa. Kuān kaa xaa ko vata kaa koo é ñu'u tsitu xū'u ti ntidi ti. ⁹ Xaa kō sán ne, kaka'an tsi dóo vá'á Xuva kō né, dadii tsi ūra í kaka'an kini iña ña'a, ña é ede kú've Xuva kō é vata kaa mii ñā. ¹⁰ Uun tsi xu'u ko kākii tú'ūn é vā'á ni tū'un é kini kaa. Ntō'o tá'an mií ko, sá'ā ne, ña te kuan kóo. ¹¹ Mí kākene ntute ne, ¿vá kūvi ntu é ikan tsi kēne ntute vidin sán ni ntūte uvé san di? ¹² ¿Vá kūvi ntu kii tñe'ú san utun ngóñū'ú san? ¿Vá kūvi ntu kii

ngoñu'ú san xo'o tinti'ó san? Dukuān dí, ña kuvi kii ntute vidin mí kakii ntute veñí san.

Xoo e dóo ki'in iní nti'xe i

¹³ Te iō nto e dóo ki'in iní ntó, e dóo tū've nto ne, kutuni ko xoo e dóo ki'in iní í tē iní o tsí kade ña e dóo va'á ne, ñá kāde ka'nu ña. ¹⁴ Ntá tsi tē dóo ntákune'u iní nto, tē dóo ncho ni'i nto iña mii ntó ne, ñá ku ká'an nto e dóo ki'in iní nto. Ká'an ntó é nuu é ntaā i. Ná ku ká'an ntó dovete. ¹⁵ Tsi é ki'in iní ntó san ne, ñuxiví san vé'xi, ñá te nta'a Xuva ko ni kī'xi. Tsí kuān ó de ña ñuxiví sa dí. Tsí nuu i sá'a ne, nima káni kaa nto vé'xi, tsi tó'ō e ña vá'a san kata'xi é kuān koo kada kuení nto. ¹⁶ Da mí'i ka ntákune'u iní ña'a, da mí'i ká ntio ña iña mii ña ne, ntánaā ña. Ntáde ña un ntíí ntíí nuu i é kīni kaa. ¹⁷ Ntá tsi te nta'a Xuva ko vé'xi e dóo ki'in iní kó ne, ña túvī nté uun nuu i é kīni kaa. Te kuntikin o tsíkan ne, dōo vá'a koo kuntoo o ni ta'an kō, dōo vá'a koo vii o ni ñā nee iña é kāká'an tá'an kō. Ntuntá'ví ini ko ñā. Níi kue'én ini ko vii o é vā'á ni da xōó ka ña'a. ¹⁸ Xoo é ntio i é kuntōo vá'a i ne, na vii ña é vā'á vatā ó ntio Xuva kō ne, kidáa ne, ní'i ntí'xe ña é vā'á koo kuntōo ña.

4

E dóo ncho kuntikin ó ñuxiví san

¹ ¿Mí'i ntu vé'xi du'xēn san? ¿Nté kuí ntánaa tsí mii ntu nto ni tā'an nto? Tsí ñiví é ntio nima káni ntaa nto. ² Ió nuu i e dóo ntio nto, ntá tsi ña tuvi iña nto. Dukuān ne, ntaé'ni nto ña'a san é ntákune'u iní nto ni ñā, ntá tsi ña ntáni'i nto é ntio nto. Dukuān ne, ntánaa nto ne, ntáde nto du'xēn. Ntá tsi ña kuvi ní'i nto é ntio nto, tsí ña ntaíkan nto nta'a Xuva kō. ³ Kuān te ntaíkan nto ne, ntá tsi ña ntáni'i nto, tsí ña vá'a o ntaíkan nto. Da ti tsi é nantí'i nto nee iña é ntio nima káni ntáa nto. ⁴ Ntō'o é ña ntáde ntaa nto é kuntikin ntó Xuva kō ne, ¿ñá ini ntú nto tsí tē ntántikin nto é kīni kaa sán ne, ntáxtuví mii nto Xuva ko? Xoó ña'a, ña e dóo ntio i nee iña é ña vá'a ne, kainchu'vi ñá Xuva kō. ⁵ Ná te dōto tsi kaka'an tú'un Xuva kō tsí Espíritu ña e tá'xi ña é kunūu nima kó ne, dōo kakukuiñū ñá ko te tūku

nuu i ntántikin o, tsi dóo kakuinima ñá kō. ⁶ Ntá tsi díí díí ka kaxntii Xuva ko kō é vii o é vā'a. Dukuān ne, kaka'an tú'un ñā: “Ñá kaxé'e Xuva kō é kūvi vii ñā'a, ñā é ncho víí ka'nu, ntá tsi dóo diní ñā kaxntii ñā ñā'a, ñā é ñā káde ka'nu san”, ka'an. ⁷ Dukuān ne, kué'e ntō é na kadā kû've kúe'en Xúva ko iña nto. Ntá tsi ñá ku dā vā'a nto é kadā kû've tó'ō e ñā vā'a san iña nto nté koo víí nto ne, kidāá né, kunu. ⁸ Kunuu inī ntó Xuva kō né, kunūu mé'ñu ñā ntō. Nakate nto nta'a nto, ðivi ntō é iō kuetsí nto. Ntantoo nto nima ntó, ðivi ntō é uvi ítsi ntaíka nto. ⁹ Na kūnta'xa nima nto. Kueku nto ve kuenta iña kuetsi ntō. Tē xkuntée nto é kīni kaa san kídaā ne, kueku nto vevii. Tē dóo diní nto kídaā ne, kuntōo nta'xa kue'en ntó ve. ¹⁰ Na ntunta'vī ntó nuu Xuva kō né, ðivi ñā nantaa dukūn ñá nto.

É ñā ká'an o xoo e vā'a i, xoo é ñā vā'a i

¹¹ Ntō'ó ta'an ko, ñá kū ka'an kīni nto iña ta'an nto. Tsí tē xoó ñā'a kaka'an ñā é kīni kaa iña ta'an ñā ne, xoó kaka'an ntée ñā ñā ne, kaka'an ntée ñā lei Xúva kō san. Kaxntékú ku've ñá lei san te vā'á ne, o tē ñā vā'a. Te kuān o kade nto ne, ñá te káde ntaa nto é kākā'án lei san, tsí mii xntō kade nto ñā é kaxntékú kū've iña lei san naa i é káda ntaa nto. ¹² Ntá tsi uun tsi ñā e tá'xi lei san. Uun ñā'a tsi ñā é kadē kû've ði. Tsí ðivi ñā ne, kuvi nakáku ñā ko, ō kuvi nakunáa ñā kō ði. Ntá tsi ðivīn ne, ¿xoó ntu ñā'an é kuvi xntékún kū'ven ta'an o?

Ñā ini o nté koo kuvi uten

¹³ Koto nto ve, ðivi ntō e ntáka'an nto: “Vevíí ne, ō utén ki'in ntí ñuú tsikán ne, ikan kuntōo ntí uun kuía. Ikan díko ntí vata koo é kué'e diu'un ní'i ntí”, ka'an nto. ¹⁴ Ñá kuān xkoó ka'an nto, tsi ñá ini nto nté koo kuvi uten. Vata ntáa viko nu'ú san ntáa ntuvi iña nto. Uun dá'na tsi ñu'u vikó san ne, dá kantava. ¹⁵ Díí ka vā'á ó te ká'an nto: “Te Xuva kō ntio ñā ne, kuntōo ntí ne, víí ntí sá'a ne, ō víí ntí tsikan”, koo ka'an nto. ¹⁶ Vevíí ne, dōo ntáde ka'nu nto kuenta iña i e ntádē kuení mii ntō é vii nto. Ñā vā'a ō é kuān koo ka'an o. ¹⁷ Xoó ñā'a é ini ñā nee iña é vā'á vii ñā ne, ntá tsi ñā káde ñā ne, iō kuetsí ñā.

5

Nté koo kuvi nī ña kuiká san

¹ Koto nto ve, xoo e dóo kuika i. Kueku nto ne, kachu'u ntáa nto é vē'xi é ntō'o nto ve. ² Nuu i é dokuika nto ne, e té'u ve. E dúku rkídín san dóo nto. ³ É kúdí kaá kuaán nto nī diu'ún kuí'xín nto. Dìvi ntāda ntaa nté ò ntí'xe nima nto. Kunaá nto kuenta iña i vata tsi koo te ñu'ú san i'xi nto. Tsí ña te nté kaa dokuika e ntánatee vá'a nto vevii, é kuān sá kaa ntuví sá'a. ⁴ Ini nto ve, tsi xá'vī ña kade tsiñu iñá nto kaikan kuetsi kuenta iña nto, é ña ni ntá'vi nīi nto ña dā ixkadá tsiñu ña iña nto. Xuva kō, ña é kadē kù've iña un ntí'í ntí'í ne, tēkú ña tsi dóo u'vi ntákuvī ña ntáde tsiñu iña nto, ña e éni nta'ví nto. ⁵ Ñá tē nté kaa vá'a o intóo nto ñuxiví sa. Da mii kuē'en tsi dodíni idé nto. È'xí va'ā ntó vata kaa kiti kae'xi dé'en di'na dá ka'nī ñá ti. ⁶ Dìvi ntō né, dōto tsi tsi'í kuétsi nto ña e dóo va'á ña'a. Xé'e ntō doxi'í ña, ña é ña tuvi kuétsi í né, ntē ña ni nadá'an ña kúñu ñā.

É kūtíi o kuntetu ò ne, é ká'an ntá'ví ò

⁷ Ntá tsi òvi nto, tā'an kó, na kūtíi nto kuntetu nto da nté nainu xtuku Tó'o kō, vata tsí ó de ña kai'xi tsíkin san é kākutíi ña kantétu ña é tīñ ña kiti i san da nté tē xee ntúvi daví san. ⁸ Na kūtíi ntō dī. Ñá xtuvī mii nto é kuinti'xe nto, tsi é vevii nainu xtuku Tó'o kō.

⁹ Ení ko, ñá ká'an ntée nto ta'an nto vata koo é ña tá'xi Xuva ko ntō é ntō'o nto. Tsí doko sa xée ña é tā'xi ña. ¹⁰ Koto nto nté ò kutíi ña ka'án naa Xuva ko kídaā da dóo ntó'o ña. ¹¹ Xo'ō ne, ntáka'an o tsi dóo diní ña, xoo é kākutíi e ntó'o i. É tēkú nto nté ò kutíi ña nani Joó san. Ini nto tsi náxnuu viko Xuva ko ñā da kúvi ntó'o ña. Tsí Xuva kō ne, dóo kantunta'ví ini ña kō ne, kata'xi ña ko é vā'á dī.

¹² Na tēkú va'ā nto sá'ā, ta'an ko. Ñá ku natekū nto Uva kō, nté e dukún kán, nté ñū'u san. Na kuinī nto é ká'an nto é nuu é ntaā í vata koo é dá ká'an nto tsí nuu é ntaā í ne, na kūntaa ntí'xe. Te ká'an nto tsí ña'a ne, kuan kōo nti'xe é ña'a, vata koo é ña ta'xi Xuva ko nto é ntō'o nto.

¹³ Te iō ntó e dóo ntánto'lo nto ne, ka'an ntá'vi nto. Te iō ntó e dóo diní nto ne, kata nto nchu'ún Xuva kō. ¹⁴ Te iō ntó e dóo vitá o ini nto ne, kana nto ñatā, ña ntákuinti'xe i san, na kā'an ntâ'ví ña iña ña nchokuví san. Na nakūtsi nuu ña ña asete kuenta iña Xuva ko. ¹⁵ Te kákuinti'xe vá'a ña kaka'an ntâ'ví san ne, ntuvá'a ña nchokuví san, tsí Xuva ko naxntitsī ñá ña. Te iō kuetsí ña ne, kada ka'nu iní Xuva ko ni ñā. ¹⁶ Dukuān ne, ká'an nto ni tā'an nto nee iña é kuetsí nto. Ka'an ntá'ví ntó iña ta'an ntó ne, na kā'an ntâ'ví ña iña nto di, vata koo é ntuvá'a nto. Tsi ñá te nté kaa kaidiá'vi te kanī nima ñá kaka'an ntâ'ví ña, ña e dóo va'á nuu Xuva ko. ¹⁷ Ña é kā'an naa Xuva ko kidaā, ña é nani Ēliá ne, ñatii vata tsi ntáa o xo'ō. Kanī nima ñá ka'an ntâ'ví ña kidaā é ña kiin dávi ne, uni kuía ntē dáva é ña nī kiin kué'en tsi daví san. ¹⁸ Kidáā ne, ka'an ntâ'vi xtúku ña é na kīn daví san ne, taxnuu Xuva ko dāví san. Kidáā né, ē'nu é tātá ña'a san.

¹⁹ Ntō'lo tá'an kó, te iō nto é ntákudana nto itsi é nuu é ntaā í san ne, te tūku ña'a kanantiko koō ñá nto é kuinti'xe xtuku ntó ne, ²⁰ divi ñā é kanantiko koō ñá ña é iō kuetsí i, ña é kaika itsi kini kaa ne, na kūtuni ña tsí kanakáku ña ña doxi'í san ne, ñá kunāá ka ña, tsí kada ka'nu iní Xuva ko ni ña, kuān te dóo kue'e kuetsi ñā.

Tū'ún xuva kō vatā ó ntáka'an ña ñuú Coatzospan
New Testament in Mixtec, Coatzospan (MX:miz:Mixtec, Coatzospan)
copyright © 2003 Wycliffe Bible Translators, Inc.

Language: Mixtec, Coatzospan

Translation by: Wycliffe Bible Translators, Inc.

Copyright Information

© 2003, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Coatzospan

© 2003, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

